

10/04/2004

Usaha perangi dadah juga mesti dalam manifesto BN

A Halim Salim

DALAM manifesto Barisan Nasional (BN) bagi Pilihan Raya Umum Ke-11 lalu, saya dapati ia tidak langsung menyebut atau sedikit pun menyentuh masalah penagihan dadah yang perlu diatasi segera.

Sebagaimana rasuah, salah guna dadah juga berbahaya dalam pembangunan negara. Bukan kita tidak menentang rasuah dari dulu, tetapi ia diberi penekanan khusus, namun mengapa tidak masalah penagihan dadah dijadikan sebahagian agenda dalam manifesto itu.

Perlu diingat tahun lalu saja, kita berdepan dengan kehadiran kira-kira 500,000 penagih, termasuk mereka yang berada di pusat serenti di seluruh negara. Tidak kurang juga penagih masih bebas dan baru yang bergerak tanpa sekatan dengan perangkaan menunjukkan 20 orang menjadi penagih baru hampir setiap hari.

Siapakah mereka ini? Majoriti penagih adalah remaja yang dikira bakal menjadi pemimpin dan pelapis negara. Sebilangan besarnya adalah Melayu yang terdiri daripada pemuda kampung dan yang sedang membesar di tanah rancangan Felda.

Apakah wujud rasa perkauman untuk menyerahkan kepada Umno saja menyelesaikan masalah ini secara sendirian?

Bayangkan jika jumlah penagih meningkat kepada satu juta orang. Apa akan jadi pada negara ini? Setakat ini jumlah penduduk lelaki dan wanita tidak jauh berbeza.

Namun, pembabitian lelaki dalam penagihan dadah boleh menimbulkan masalah sosial lebih rumit. Ditambah pula remaja dan lelaki turut terbabit dengan kegiatan kongsi gelap, samseng, lumba haram, gay dan yang lebih teruk ada yang menukar jantina. Berapa saja lelaki yang tinggal?

Renungkanlah isu salah guna dadah ini. Saya kira masih belum terlambat untuk dijadikan lembaran tambahan dalam manifesto Umno mahupun BN.

Dalam bukunya *The Malay Dilemma*, bekas Perdana Menteri, Tun Dr Mahathir Mohamad ada menulis: "Saya tidak perlu meminta maaf pada sesiapa kerana saya tidak bersalah (saya cuma memperbetulkan keadaan). Jika kritik ini menyinggung sesiapa, fikir dan renunglah tanpa sentuhan emosi, tetapi dengan sentuhan fikiran terbuka.

A HALIM SALIM,  
Shah Alam.